



O jeri ator dut il dì, ancje se mi plâs di plui il cidin dai passons, mi coven il grisôr e il ruzin des citâts datis dongje te epoche dal jugosocialisim.

Pôc prin des sîs mi indreci viers la stazion par rivâ la coriere par Vrhnika, un lûc innomenât, ma par me Vrhnika no je nuie altri che no un durmitori, dome par durmî, in doi agns no ai mai cjatât il centri storic.

Mi met a spietâ denant dal sotpuarti de stazion. Jentrant mi passe pal cjâf une sene nassude dôs oris prime al Partizan: Mare al à daspò une barufe fisiche cul president dal club di box, lassât in proteste la palestre. Si àn picjât cence manecis, ciulât e porconât, il vieli però al à fat ancjemò une biele figure, si viodeve che une volte al jere pardabon un gran boxadôr.

„Ej Jackson“, mi strenç la sô man a mût merecan un tip cuntune muse violente tant che se al fos il gno vieli amì.

“Oj..Eh“, mi pâr di no cognossilu, ma o vevi masse pôc timp par jessi sigûr o pensâ sore, parcè che propit in chel moment al è rivât il Krpan, il bus par “Vrhnika“, lu clamin “Krpan” daspò il gjigant sloven che al à copât a Viene il cjâfjaniçar osman »Brdavs«.

Si vierzin i puartons di jentrance, un pôc disjustâts, bruts e cragnôs, ma tal stes timp domestics tant che dut il mont socreâl.

Ognidun si met subit in prime posizion par tirâsi dentri, o rivi adore a cjapâ un sentât, tal

mieç dal bus - mi senti.

«Ti viôt simpri a puartâ grandis valîs», si sente a bande di me chel mat spacât di pôc prime.

O straten di bot il flât, lui al va indevant: »Ma ce fâstu cun chest grant bagai?«

Ce vuelial chel bulo, bintar, un alcolic. “Sì, eh..”, o tachi a rispuindi cence vê un pinsîr clâr salacor parvie che o vevi pôre, ma salacor, almancul al podarès jessi che lu cognossedi, forsit un amî dal pugjil Mare. A àn di jessi ducj i doi di chestis bandis mi pâr. Chel istès mût di fevelâ tant che si fevele tes monts sore di Vrhnika.

»Tu ce fâstu cuntun bagai cussì, âstu alc di scuindi?«

»O soi un student jo e.... o fâs sport.«

»Pugjilât?«

»Sì, ancje chest, o soi stât cualchi volte al Partizan.«

O volevi domandâ se al cognòs Mare, ma no lu fâs, al veve un mût masse diret che no ti resti altri che no rispuindi cjapât te rêt tant che un pês.

»Ti ai viodût la domenie passade al Bar blu«

»Al Bar blu - al pues jessi.«, in chel moment invezit o jeri sigûr che chel li no mi cognòs nancje par dongje e nancje jo no lu cognòs e no lu ai mai viodût: »Ma jo no..no soi mai stât tal..«

»Jo ti cognòs Jackson, e tu lu sâs benon!«, mi strencj la man e si jeve sù viers la puarte, une stazion denant di Vrhnika.

»Ma no, no...tu mi cjapis par un altri!«

Chest però no lu à sintût plui.

**di Janez Erat**

**#13**

Par condividi:

Facebook

WhatsApp

Telegram

Print

Email